

**Sarawak Report tak dapat diakses selepas dedah gambar Najib  
The Malaysian Insider  
July 7, 2015**

Laman sesawang pendedah maklumat, Sarawak Report tidak dapat diakses semula, sehari selepas mendedahkan sekeping gambar Perdana Menteri Datuk Seri Najib Razak serta isterinya Datin Seri Rosmah Mansor, pegawai PetroSaudi dan ahli perniagaan Low Taek Jho yang ketika itu didakwa bercuti di Selatan Perancis.

Tidak dapat dipastikan punca mengapa laman sesawang yang berpusat di London itu tidak dapat diakses dalam insiden terbaru ini.

Minggu lalu, Sarawak Report juga berkata laman sesawangnya mengalami "serangan" sama, ekoran pendedahan Wall Street Journal (WSJ) mengenai dakwaan US\$700 juta (RM2.6 bilion) dimasukkan ke dalam akaun perdana menteri.

Gambar itu didakwa diambil pada Ogos 2009, menunjukkan Jho Low, pemilik PetroSaudi Putera Turki; Najib; isterinya Rosmah; anak mereka Nor Ashman dan Nooryana Najwa, dan pengarah PetroSaudi Tarek Obaid tersenyum lebar atas bot mewah Tattoosh.

Gambar itu didakwa dihantar pegawai khas Najib kepada Tarek Obaid dan Jho Low sebagai tanda kenangan.

Bagaimanapun, semakan The Malaysian Insider pada jam 3.30 petang mendapati Sarawak Report sudah boleh diakses semula.

Sementara itu, pengarang Sarawak Report Clare Rewcastle Brown memberitahu The Malaysian Insider, laman webnya kerap menerima serangan sejak 3 minggu lalu.

Katanya, pihak yang terlibat dalam serangan itu pastinya mengupah individu yang "mahal" cuba membuang cerita yang "tidak digemari" dan mengganggu kemudahan carian Google laman sesawang terbabit.

Katanya, penyerang juga dilihat menggunakan teknik Distributed Denial of Service (DDOS) baharu yang melibatkan letusan mikro yang boleh menyebabkan laman sesawang tidak berfungsi, tetapi ia sukar untuk dikesan.

"Mereka juga mula menjalankan kerja itu ketika kami sedang tidur, kerana mereka sedar kami berada dalam waktu Eropah.

"Tindakan ini tampak tidak matang dan tidak produktif, tetapi saya rasa ada orang yang menerima bayaran besar membekalkan perkhidmatan ini dan memberitahu pelanggannya yang mereka berjaya mengganggu kami," katanya.

Brown berkata, pasukan Sarawak Report sedang "mengatasi segalanya walaupun terdiri daripada sekumpulan sukarelawan yang kecil. – 7 Julai, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/sarawak-report-tak-dapat-diakses-selepas-dedah-gambar-najib>